

Plenchi

Bèl a bati

Bèlèm bèlèlem tring tringgggg nos tei nos tei. Yega paso ta abo so falta pa kompañá nos riba nos plenchi di skol. Nos a drenta e simannan final di skol. Eksamen a kuminsá pa skolnan avansá i Efo tambe a kuminsá pa esnan ku ta den grupo 8. Nos ta deseá tur nos hóbennan hopi sabiduria, trankilidat i konsentrashon pa nan pruebanan. Mayornan perkurá pa un ambiente trankil i relahante na kas. Sin muchu were were, konflikto òf zundramentu. Lanta un tiki mas trempan, 15 minut mes ta suficiente, ku otro dianan. Brasa bo yu un tiki i prepará su desayuno preferí. Sinta ku ne i duné atenshon un ratu. Pone un músika dushi, no pone notisia pa e kuminsá su dia ku yen papiamentu i kisas kasonan tristu. Sali kas un 15 minut mas trempan ku normal i kore yega skol. Den outo pone musika i no notisia, ora e baha na skol bo por tende bo notisia normal. Enkurashé, bise bo ta kere den dje i ku bo ta hasi orashon pa e por ta trankil durante di e eksamen of e pruebanan. Komo mama e dianan aki loke bo por hasi ta soru pa e ta trankil i e por drumi trempan i lanta trempan pa asina no mester hasna mainta haña stress. Pone tur kos kla for di anochi, tur paña strikà i mea ku sapatu kla. Pone e djus kaba for di anochi den e termos den frishidèl i drecha e pan tambe pone kla den frishidère. Mainta bo ta saka esun ku e ta bai kome keinte un tiki den micro wave of den un panchi. E otro bo ta pone kla pe bai skol ku ne.

For di anochi lague drecha su tas i kontrolé ku tur kos ta aden. Djis hasi un steekproef i puntre bo a kordá kue bo itui, bo tin pèn di reservá, bo potlot tin punta, bo tin bo calculator etc.

Eksito na tur hòben ku e fase final di skol aki.

Orashon

Tata Santu, danki pa Bo presensia

Danki pa bo amor,

Danki pa bo sabiduria,

Danki pa bo protekshon,

Danki pa bo Spiritu Santu.

Amen

Riba roster

Sint Antonius College Family Fun Sportday

Nos skol tambe ta kere den union i forsa di famia. Pesei nos famia di St. Antonius College , tin su propio Universidat di mayor (PUSAC). Un aktivitat dushi i bon pa salú tabata nos dia di deporte. Algun studiante di ROC Tilburg (Hulanda) ku ta studiando pa bira ‘sportleider’/ lider di deporte, a yuda nos organisá, djasabra mainta 16 di aprel, e gran evento deportivo na nos skol. E tabata un éksito rotundo. E lidernan, nos Tonitosnan, nos mayornan i nos koleganan a hasi diferente wega hopi sportif. Famianan a bin bon respresentá pa; tata, mama, oma, opa, tanchi, tio, madrina ku nan yunan. Mayornan a bisa; ku e dia di famia i deporte ta bal un ripitishon.





Not'é riba bòrchi Atardi di pelíkula

Inner Wheel Curaçao ta un organisashon sosial di hende muhé ku a skohé Sint Antonius College pa òrganisá un dushi 'Kids Movie Afternoon'. Esaki a tuma lugá djamars, 19 di aprel 2016. Nos atardi di sine, na The Movies tabata un atardi ameno! Nos muchanan a wak e premier di "Jungle Book". Nos muchanan a haña trit di pòpkòrn ku limonada, hamburger i un saku di mangel. Sint Antonius College ta hopi agradecido ku e opsekio bunita di Inner Wheels Curaçao.





Den agènda

Dianan liber di skol

- Fakansi grandi 4 yuli te ku 10 ougustus 2016

Konferensha pa personal skolnan katólíko 8 di ougustus 2016

Promé dia di skol pa alumnonan ta 11 di ougustus 2016.

Mi ta konta



Mucha djispou

Bernadette ta sorprendí di tende di dòkter ku e ta na estado awor na su 45 aña di edat. Su yu chikí ya tin 10 aña di edat. El a pensa un par di ora kon e ta hasi bisa su kasá. Despues di kome el a sinta basta ratu promé ku el a kue un kurashi i a bisa su kasá: “dushi mi tin un sorpresa pa bo, nos ta bai haña un baby.”

E hòmber a hisa kara wak Bernadette tur sorpresá. Bernadette a ignorá e ekspreshon i a puntra su kasá: “Ki bo ke pa e ta?”

Su kasá : “un chisté? ”